



Broj: 03/1-50-14-7-24-13/16

Sarajevo, 13.6.2016.

PREDMET: Informacija o sastanku članova Zajedničke komisije za odbranu i sigurnost BiH s polaznicima visokih studija sigurnosti i odbrane Vojne akademije Ministarstva odbrane Republike Srbije, 28.4.2016.

Članovi Zajedničke komisije za odbranu i sigurnost BiH i parlamentarni vojni povjerenik BiH primili su 28.4.2016. u Sarajevu polaznike visokih studija sigurnosti i odbrane Vojne akademije Ministarstva odbrane Republike Srbije.

Zajedničku komisiju za odbranu i sigurnost BiH na ovom sastanku predstavljali su: predsjedavajući Zajedničke komisije Sifet Podžić i članovi Bariša Čolak, Hazim Rančić i Mario Karamatić, dok su polaznike Vojne akademije Ministarstva odbrane Republike Srbije predvodili general - major Vojske Srbije Želimir Glišović i načelnik visokih studija pukovnik Zoran Lučić.

Sastanku su prisustvovali Ljiljana Milićević, sekretarka, i Željko Grubešić, stručni savjetnik u Uredu sekretara Zajedničke komisije.

Tokom susreta, predsjedavajući Zajedničke komisije Sifet Podžić informirao je goste iz MO Republike Srbije o organizaciji i osnovnim nadležnostima Zajedničke komisije za odbranu i sigurnost BiH. Podžić je tokom uvodnog izlaganja naglasio da Zajednička komisija, osim informacija koje dobiva od Ministarstva odbrane BiH, obavlja i terenske posjete jedinicama i komandama Oružanih snaga BiH (OSBiH) kako bi stekla uvid u realno stanje i na taj način, u saradnji s odgovornim licima u Ministarstvu odbrane i OSBiH, rješavala aktuelne probleme s kojima se susreće sektor odbrane u našoj zemlji. S tim u vezi, Podžić je rekao da je u narednom periodu potrebno obaviti širu i otvorenu raspravu o statusu OSBiH, njihovoj veličini i strukturi, te nizu drugih pitanja iz domena odbrambenog sistema BiH.

Parlamentarni vojni povjerenik BiH Boško Šiljegović upoznao je delegaciju iz Srbije s modelom zaštite ljudskih prava i osnovnih sloboda uniformiranih vojnih lica u OSBiH. Prezentirajući glavne aktivnosti kojima se bavi Ured parlamentarnog vojnog povjerenika u našoj zemlji, Šiljegović je istaknuo da je najveći stepen kršenja ljudskih prava pripadnika OSBiH do sada zabilježen u oblastima koje se odnose na procese unapređenja u OSBiH, uslove života i rada u jedinicama i komandama OSBiH, te u vezi s nedostatkom materijalnih i materijalno - tehničkih sredstava.

Tokom sastanka razgovaralo se i o aktivnostima Bosne i Hercegovine na putu ispunjavanja obaveza za početak realizacije Akcionog plana za članstvo u NATO-u (MAP), kao i o mogućnostima saradnje koje oružane snage dvije zemlje, u okviru dobre bilateralne saradnje,

ostvaruju kroz Program NATO-a „Partnerstvo za mir“, a koje se ogledaju u programima obuka vojnih lica, odnosno njihovom tehničkom, informatičkom i stručnom usavršavanju.

Polaznici visokih studija sigurnosti i odbrane Vojne akademije Ministarstva odbrane Republike Srbije su nakon uvodnih izlaganja članova ZK postavili jedan broj pitanja o kojima se razgovaralo u prijateljskoj i dobrosusjedskoj atmosferi.

Predsjedavajući Zajedničke komisije

Sifet Podžić

Dostavljeno:

- naslovu
- a/a